

PENGORBANAN TOKOH² PERLU DIKENANG

SILAM

KUALA LUMPUR 26 April — Bangsa dan negara yang besar dan berkebudayaan tinggi adalah bangsa dan negara yang tahu menghargai jasa pahlawan dan tokoh-tokoh zaman silam, tegas Datuk Sri Dr. Mahathir Mohamad hari ini.

Perdana Menteri berkata pengorbanan tokoh-tokoh zaman silam perlu dikenang dan diteliti sumbangannya kerana akan memberi pengajaran dan panduan kepada semua bagi membangun negara ini.

Beliau mahu rakyat Malaysia menghayati sejarah serta tahu menghargai jasa mereka yang berjuang dengan senjata untuk mempertahankan negara, mereka yang berjuang dengan ke-

pintaran dan akal fikiran untuk mencapai kemerdekaan dan mengembalikan maruah bangsanya dengan mengorbankan harta-benda, tenaga dan masa dan mereka yang mengabdikan diri kepada ilmu untuk mendidik anak bangsa.

"Haruslah kita ingat bahawa sesiapa yang tidak mempelajari sejarah akan didera dengan mengulangi segala kesalahan berkali-kali," tambahnya semasa merasmikan Seminar Biografi Malaysia selama tiga hari tajaan New Straits Times di Universiti Malaya.

Beliau juga melancarkan Kamus Biografi Malaysia yang merupakan buku rujukan yang lengkap tentang tokoh-tokoh yang telah men-

jadikan Malaysia sebuah negara yang dapat dibanggakan.

Datuk Sri Dr. Mahathir berpendapat sejarah adalah lebih daripada hanya sebagai satu sumber untuk mempelajari masa lampau, bahkan sejarah menunjukkan arah masa depan.

"Demikianlah sejarah menyedarkan bahawa kita adalah satu bangsa, dibentuk atas kebijaksanaan pemimpin kita, dari kaum-kaum yang pada suatu waktu hidup secara bersendirian sendiri tanpa rasa persamaan dan tanpa terikat oleh sesuatu destini," ujarnya.

Perdana Menteri berkata menoleh ke belakang menyedarkan rakyat Malaysia tentang berapa jauh mereka sudah berjalan bersama-sama untuk membentuk satu bangsa Malaysia.

"Titik-titik hitam sepanjang perjalanan itu memberikan kita panduan untuk membezakan nilai-nilai yang baik dengan yang buruk, yang hendak dipelihara dan diteruskan dan yang hendak dlenyapkan.

"Hanya dengan mengetahui dan meneliti apa yang kita lakukan hari semalam, kita tahu apa yang hendak kita lakukan hari ini."

Beliau menarik perhatian bahawa menerusi sejarah, seseorang itu boleh tahu siapa dia, asal-usulnya, nenek moyangnya, mengenal diri sendiri, keluarga, kaum kerabat, jiran tetangga, komuniti dan bangsa.

Katanya, sungguhpun kesedaran perkauman masih ada dan mungkin masih tebal di setengah - setengah golongan, tetapi semua sedar mereka tidak dapat elak daripada meneruskan hidup ini secara bersama.

"Kita sama-sama berpeluang menentukan sama ada mahu hidup dalam aman dan damai antara satu sama lain atas dasar saling memahami dan menghormati antara satu sama lain, atau mahu hidup terus menerus dalam keadaan tidak aman dan tenteram yang tidak mungkin menguntungkan sesiapa."

Datuk Sri Dr. Mahathir mengalu-alukan projek Kamus Biografi yang bakal dikeluarkan kerana ia merupakan sebahagian daripada pengkajian sejarah dan melaluinya, semua dapat mempelajari banyak pengalaman bangsa dengan meneliti kehidupan tokoh-tokoh penting.